



«YOSHLAR YILI» SENING NAFASING

O'zimni dunyodagi eng baxtli qiz deb bilaman. Ayni damda bu baxtni yurtimizdagi har bir yosh his etayotgan bo'lsa, ajabmas.

Aynan «Yoshlar yili»da o'zim sevgan sohaning diplomini qo'lga kiritaman. Bu ham hayotimdagi eng katta yutug'im. Kelajakda el koriga yaraydigan jurnalist sifatida yurtga tanilmoqchiman. Axir yurtga kerakli inson bo'lishdan ham ortiq baxt bormi?!

*Uchar otga aylan hayotda,
Parvozga aylansin ovozing.
Ezgulikka bog'lan bu otda,
Moviylarni quchsin parvozing.*

*«Yoshlar yili» sening nafasing,
Yaxshilarga kelsin havasing.
Asl boylik yoshlikdur asli,
Qaytib kelmas aslo bu daming.*

Nafisa RUSTAMOVA,

O'zMU jurnalistika fakultetining 4-bosqich talabasi



ORZULAR PARVOZINI TILAYMAN!

2007-yilda «Kelajak ovozi» tanlovining Badiiy ijod yo'nalishida she'rlarim va jamiyat hayotining asosiy nuqtalarini yorituvchi maqolalarim bilan ishtirok etib, g'olib deb topildim. Men bundan baxtiyorman. Shuni angladim-ki, bugun o'z fikriga ega bo'lgan iqtidorli farzandlarning barchasi munosib taqdirlanib kelinmoqda. Ana shunday yuqori natijalarga erishishimning sababi kitob va unga bo'lgan muhabbatimdir. «Yoshlar yili»da yurtimizdagi barcha yoshlarga omad, orzular parvozini tilayman!

Otabek RAHIMOV



BARCAGA MADAD BO'LSIN!

2008-yilni «Yoshlar yili» deb e'lon qilingani ko'pgina imkoniyatlarga turtki bo'ldi. Bu damlar umrning eng go'zal xotiralariga boy bo'lib, abadiyatga aylanadi. Istardimki, har birimiz yoshligimizni mazmunli, xushnud o'tkazaylik.

Umida UZOQOVA,
«Mehr nuri» jamg'armasining
2007-2008-o'quv yili stipendianti



Vatan yagonadir, Vatan bittadir!

O'zbekiston Respublikasi bolalar va o'smirlar gazetasi

Gazeta 1929-yil 1-avgustdan chiqa boshlagan

2008-yil
18-fevral
N:8
(66653)

«Tong yulduzi» bilan biz hamisha xushchaqchaqmiz!

Suratda: Toshkent shahar, Sergeli tumanidagi
300-maktabning ustoz va o'quvchilari.



KEYINGI SONLARDA O'QIYSIZ:

1 LEV TOLSTOYNING
BOLALAR UCHUN
YOZGAN ENG YAXSHI
HIKOYALARI

2 KUTUBXONAM,
KUTIB
QOLMA!

3 SHE'R ISHQI

Muhiddin OMON

HAMISHA YORUG'DIR YULDUZLI SAMO

(Yoshlar marshi)

Istiqlol nurini tuygan avlodmiz,
Ko'kdagi lochindek erkin, ozodmiz.
Baxtimiz barqaror go'zal Vatanda,
Ulug'lar shoniga voris zuryodmiz.

Gul Vatan bag'rida gulga o'xshaymiz,
Hur Vatan koriga hamisha shaymiz.
Buyuk ajdodlarning shiori dilda:
Elim deb, yurtim deb, yonib yashaymiz!

Naqorat:
Hamisha yorug'dir yulduzli samo,
Hilol nur sochadi, panohdir Humo.
Navqiron vujudga to'lg'onar yurak,
Aziz O'zbekiston, Senga jon fido!

Biz yoshlar davlatning suyanchlarimiz,
Ota yurt, ona el quvonchlarimiz.
Buyuk kelajakning bunyodkorlari,
O'zbekning umidi, ishonchlarimiz.

Kamolot ko'zgusi – iste'dodimiz,
San'at-u mahorat ham ijodimiz.
Ilm-u fan toqida oftob misoli,
Porlagay elsevar e'tiqodimiz!

Biz Vatan posboni, shunqorlarimiz,
Ko'kni ko'zlagaydir tulporlarimiz.
Xalqimiz tinchligin buzmoq istasa,
Xor-u zabun bo'lar ag'yorlarimiz.

Naqorat:
Hamisha yorug'dir yulduzli samo,
Hilol nur sochadi, panohdir Humo.
Navqiron vujudga to'lg'onar yurak,
Aziz O'zbekiston, Senga jon fido!

Ishq bog'iga kirgan o'spirin,
Deydi: — Ilk bor kashf etdim o'zim!
U ko'rmaydi, ming yillar burun,
O'tgan-ketgan bobolar izin.

SHUHRAT

NAVOIYGA O'XSHASAK

Uchinchi chorakning boshida maktabingizda qanday bayram o'tkaziladi, desam, shubhasiz Navoiy bobomiz tavallud topgan kunni aytasiz-a?! Barakalla, fikringizga qo'shilaman. Axir buni boshlang'ich sinf o'quvchisi ham biladi-ku. Zero, Sergeli tumanidagi 300-maktabning 3-«B» sinf o'quvchilari tomonidan o'tkazilgan tadbirni ko'rib, bunga amin bo'ldim.



— Bugungi bayramda men sahnaga Navoiy bo'lib chiqaman, mana, kiyimlarimni qarang, — deydi sahna ortida she'rini takrorlayotgan bolakay Abror ABDULLAYEV. Ular sinfdoshlari bilan Navoiy tavalludiga bag'ishlab tadbir tayyorlashgan. Sinf rahbari **Munira opa YUSUPOVA** ularga bosh-qosh. Sahnada «Munojob» kuyi ostida o'quvchilar birin-ketin ko'rinishdi. Ular so'zni assalomdan boshlashdi:

«Assalom, Navoiy, mo'tabar ustoz,
Xalqim e'zozlagan buyuk ajdodim»...

Navoiyni ta'riflashni boshlagan qizaloqning gapini eshiting:

— Yosh Alisher bolaligida o'tkir zehni va ziyrak, ilmga chanqoq bo'lgan, 4-5 yoshidanoq o'qish va yozishni bilib olgan, — deb bijirlaydi-yu, uning o'zi ham, sahnadagi sinfdosh do'stlari ham bu ta'rifga loyiq, nazarimda.

Xalqimizda bolalarga ibrat bo'lguvchi hikmatli

so'zlar ko'p. Siz ulardan nechtasini bilasiz? Navoiyning ham hikmatlaridan o'qigandirsiz-a? O'quvchilar ulardan bir nechtasini yod olishibdi. Sinfning tirishqoq o'quvchilaridan biri Avazbek ABDUHAMIDOV o'zi yod olgan hikmatli so'zini shunday izohlaydi:

— Ustozim barchamizga Navoiy o'gitlarini bo'lib berganlar. Menikini eshitib ko'ring: «Olamdan g'amsiz o'tay desang, ilm-u hunar o'rgan», deganlar bobomiz. Biz ham ustozdan bilim olib, mana bugun sahnada buni ko'rsatyapmiz. Bayram orqali esa Navoiy bobomiz haqida ko'p narsalarni bilib oldik. Ular ustozlarni, otanamizni hurmat qilishimiz kerakligini, birini oy deb bilib, birlarini quyosh deb bilishimiz kerakligini she'rlarida yozadilar.

Shuningdek, tadbirda bolalar Navoiyning chet tiliga tarjima qilingan ruboiylaridan ham o'qib berishdi. 3-sinf o'quvchisining rus va ingliz tillarida aniq talaffuz bilan gapira olishi bu maktabda yangilik emas. Chunki maktabda o'quvchilarning chet tillarini o'rganishlariga katta e'tibor beriladi. Koreys markazi mutaxassislari bilan hamkorlikda koreys tili to'garagi ham tashkil qilingan. Bu sinfda Akbar Ubaydullayev chet tili «bilimdoni». 300-maktabning o'quvchilari faqat o'qish bilan ovora ekan-da, deysizmi, yo'q-yo'q, ular o'yin-kulgini ham bilishadi. Axir tadbir raqs-ashulasiz o'tarmidi? Sevimli san'atkorimiz Yulduz Usmonova Navoiyning bir nechta tuyuqlarini ijro etgan. Ulardan biriga 3-«B» sinf o'quvchisi Shahzoda MIRSAG'DULLAYEVA raqsga tushdi. U sinfning raqqosa qizi ekan. Tadbirlar uning raqsisiz o'tmaydi.

Tadbir so'nggida esa o'quvchilar jo'r bo'lib, Navoiyning ustoz haqidagi so'zlarini takrorlashdi. Bu

orqali ular Navoiyni anglatgan ustozlariga rahmat aytgan bo'lsalar, ne ajab! Zero, «Bir darsda 30-35ta o'quvchiga bilim berilsa, bunday tadbirlarda butun maktab o'quvchilari nimanidir o'rganishadi, dunyoqarashlari kengayadi. Shuning uchun maktabdagi ochiq darslar, tadbirlarni hamisha qo'llab-quvvatlaymiz. Bu yil «Yoshlar yili»da ularni yana-da kengaytirib, yangi tanlovlar ham tashkil etmoqchimiz. Hozirda shulardan biri «Direktor stipendiyasi»ga o'quvchilarni saralashni boshladik. Unda ham maktabda o'tkazilayotgan bayram va tadbirlarda faol ishtirok etib kelayotgan o'quvchilar hisobga olinadi», deydi maktab rahbari **Malika opa ABDULLAYEVA**.

Demak, tadbir va ko'riklarga boy ushbu maktabda yana uchrashamiz. Keyingi sonlarimizda sizni maktabning «Direktor stipendiyasi» g'olibi bilan tanishtiramiz, degan umiddamiz.

Sayyora JO'RAYEVA



SOVG'ALAR KUTMOQDA!



Aziz o'quvchilar! «Tong yulduzi» gazetasining 2007-yil 39-sonida «Boy bo'lishni istaysizmi?» sovrinli tanlovi e'lon qilinganidan xabaringiz bor. Ushbu tanlovda Toshkent shahridagi 225-maktabning 7-«V» sinf o'quvchisi Tohirjon Ubaydullayev hamda Respublika ixtisoslashgan maktab-majmuasining 4-«B» sinf o'quvchisi Madina Sultonovalar g'olib deb topildilar. G'oliblar tahririyatga taklif qilinib, ularga atalgan sovg'alar topshirildi. Tahririyat xodimlari Madina va Tohirjonni tanlovda g'olib bo'lganliklari bilan qutlab, ular bilan birgalikda esdalik uchun suratga tushdilar.

— «Tong yulduzi» gazetasida o'tkaziladigan har bir tanlovda ishtirok

etishga harakat qilaman, — deydi Madina. — «Boy bo'lishni istaysizmi?» tanlovi e'lon qilinganidan so'ng, gazetaga birinchilardan obuna bo'lish istagi meni tinch qo'ymadi. Shuning uchun ham bobojonim bilan birgalikda suratim va obuna varaqamni tahririyatga olib kelgandik. Bugun esa tanlovda g'olib bo'lganimdan nihoyatda xursandman.

Eslatib o'tamiz: «Boy bo'lishni istaysizmi?» tanlovi davom etmoqda. 2008-yilning ikkinchi yarmi uchun obuna bo'lib, obuna varaqangiz va suratingizni tahririyatga yo'llang. Mustaqillik bayrami arafasida tanlov ishtirokchilarining barchasi tahririyatga taklif qilinib, birgalikda g'olibni aniqlaydilar. G'oliblarni sovg'alar kutmoqda!



JAJJI IXTIROCHI

Besh yoshli Hamidjon otanasidan barvaqt yetim qoldi. Juda keksayib qolgan Mehri buvijonisi uni oq yuvib, oq taradi, o'zi yemay yedirdi, kiymay kiydirdi... Ko'p o'tmay, u kishi ham olamdan o'tdi.

Mahalla oqsoqollari bilan maslahatlashib, Malika opa Hamidjonni o'z qaramog'iga oldi.

Bir kuni Hamidjonni bozorga olib bordi. Ancha narsalar xarid qilib qaytishayotganda, Hamidjonning ko'zi bir kitobga tushib qoldi.

— Malika opa, iltimos, menga mana bu mashinalar rasmi bor kitobchani olib bering, — dedi u yalinib-yolvorib.

Malika opa kitobchani olib berganida, juda quvondi va kitobni qo'lidan qo'ymay o'qidi. Tez orada «Yosh texniklar» to'garagiga a'zo bo'ldi. Bir kuni u mittigina mashina yasadi va uni do'sti Murodjonga sovg'a qildi. Shundan buyon uni «Ixtirochi bola» deb chaqirishyapti. Hamidjon ulg'aygach, muhandis bo'lmoqchi. Shuning uchun hozirdanoq puxta bilim olyapti.



Mushtariybegim ISOQOVA,
Toshkent shahridagi 91-maktabning 6-sinf o'quvchisi

SIRINGIZNI KIMGA AYTASIZ?



Bu borada har kimning fikri turlicha bo'lsa kerak. Kimdir sirini ishonib do'stiga, dugonasiga aytsa, yana kimdir otasiga yoki onasiga aytishi mumkin. Aksincha, umuman sirini hech kimga aytmaydiganlar ham oramizda uchrab turadi. Poytaxtdagi 70-maktabning 6-«D» sinf o'quvchilari sir saqlashni quyidagicha izohlaydilar:

BIROVGA «SOTIB» QO'YMASMIKIN?

Ba'zida juda zerikkanida, yaqin dugonam bilan suhbatlashib o'tiraman. Lekin hamma sirlarimni unga aytolmayman. Chunki men aytgan gaplarimni boshqalarga «sotib» qo'ymasmikin, deb o'ylab qolaman. Birovni sirini saqlash qiyinligini bilaman. Buning uchun inson mard bo'lishi kerak. Alisher Navoiy bobomiz aytganlaridek, sir saqlash ham jasoratdir.

Dilorom SAMATOVA

KO'NGILDAGI TUYG'ULAR

Sir! O'zi nima degani? Menimcha, sir bu yurak tubidagi hech kimga aytolmagan orzu va xayollarimiz bo'lsa kerak. Inson boshqalardan yashirgan tuyg'ularni ko'nglining tubida saqlaydi. Ba'zi hollarda eng yaqin insoni bilan bu tuyg'uni o'rtoqlashgisi, undan maslahat olgisi keladi. Ana shunday holatga duch kelganimda, o'z sirimni onamga va eng yaqin do'stinga ayta olaman. Lekin har kim ham birovning sirini saqlay olmaydi. Bundaylarga esa hech qachon ishonib bo'lmaydi.

Dildora ABDUJABBOROVA

SIRDOSH QANDAY BO'LADI?

O'zi sirdosh qanday bo'lishi kerak, degan savolga shunday javob bera olaman: sirdosh ishonib aytgan gaplarini birovlariga aytmaligi kerak. To'g'ri, birovning sirini saqlash juda qiyin. Men sirlarimni eng yaqin dugonam Malikaga aytaman. U men aytganlarimni hech kimga aytmaligiga ishonaman.

Umidaxon SHAROPOVA

DADAMDAN YASHIRAMAN

Qiz bolaning sirlari ko'p bo'lsa-da, sirdoshlari oz bo'ladi. Men barcha sirlarimni onamga aytolmayman. Chunki onam dadamga aytib qo'yishlaridan qo'rqaman. Dadam oila boshlig'i bo'lganliklari uchun har xil muammolarni aytib, boshlarini qotirishni xohlamayman. O'ylab ko'rsam, oila boshqarish oldida mening sirlarim arzimasa bo'lib ko'rinadi. Shuning uchun ham oyimni va dadamni qiynamay, sirlarimni dugonamga aytaman.

Mahliyo QURBONBOYEVA

YURAKKA SIG'MAGAN GAPLAR

Ayrim insonlar sirni hech kimga aytish kerakmas, uni yurak tubida saqlash kerak, deb hisoblaydilar. Menimcha, sirni kimgadir aytib, yurakni bo'shatish lozim. Bo'lmasa inson siqilib ketadi. Bunday vaziyatlarda yurakka sig'dirolmagan xoh quvonchli, xoh tashvishli o'y-xayollarni yaqin do'stlarga aytsa, yomon bo'lmaydi. Yaxshi do'st albatta yaxshi maslahat bera oladi. Men ham o'z sirlarimni ustozimga aytaman. Shundan so'ng, yengil tortaman. Chunki men ularga ishonaman.

Shirin SAIDG'OZIYEVA

ZULQARNAYN HOLIGA TUSHMAYMAN

Men ishonib sirimni aytadigan inson qanday bo'lishi kerak? Eng avvalo, u mening aytganlarimni hech kimga aytmaligi va menga to'g'ri maslahat bera olishi kerak, deb o'ylayman. Mening bunday yaqin insonim borligidan xursandman. Boshlang'ich sinfdan beri birga o'qib kelayotgan sinfdoshim Bobur eng yaqin sirdoshim. Sir saqlash o'ta mushkul bo'lsa-da, hech qachon Iskandar Zulqarnayn holiga tushmasligimga ishonaman.

Jahongir OBIDJONOV

HECH KIMGA AYTMAGANMAN...

Men sirimni hech kimga aytmaganman. Chunki uchinchi odam bilgan sirni sir deb bo'lmaydi. Biz xayolimizda o'ylagan har bir o'yni sir deb hisoblamasligimiz kerak. Biror-bir xato qilib, uni sir deb hisoblab yashirib yurish noto'g'ri. Aksincha, bu xatoni otamonimizdan yashirmay aytak, ular bizga to'g'ri maslahat berishadi. Shu bilan bunday xatolarni qayta takrorlamaslikka imkon tug'iladi.

Dilafroz ABDURAHIMOVA



«Mahallaning namunali qizi» mavzusidagi ko'rik-tanlov Uchtepa tumani, «Jurjoni» mahallasi qizlarining tinchini buzdi. «Kim bo'larkin-a, namunali qiz?» degan fikr ularning xayoliga o'rnatildi. Mahallada istiqomat qilayotgan 90 nafar qizlarning 30 dan ziyodi tanlovda qatnashish istagini bildirishgach, tayyorgarlik qizigandan qizidi. Tanlov tikuvchilik, to'quvchilik, qandolatchilik, uy hamshirasi, kompyuter o'quv yo'nalishlari bo'yicha bo'lib o'tdi. Aziza bel-lashuvda tengdoshlaridan ustun chiqdi. Qizlarni oilaviy hayotga tayyorlashda bunday tadbirlarning o'rni beqiyosligi yana bir bor namoyon bo'ldi. Zero, har tomonlama barkamol, sog'lom farzandlar yurt kelajagi hisoblanadi.

Aziza G'iyosova mustaqillik tengdoshi. U Yunusobod tumanidagi 9-maktabda o'tkazilgan «Maktabimizning zukko qizi» tanlovida ham g'olib chiqdi.

O'z ustida ishlab, bilim va malakasini muntazam oshirib borayotgan Aziza G'iyosova Zulfiya nomidagi Davlat mukofoti ko'rik-tanlovining tuman bosqichida san'at yo'nalishi bo'yicha g'olib chiqib, shahar bosqichiga yo'llanma oldi. Iste'dodli va iqtidorli qizning kelajakda Zulfiyaxonim orzu qilganlaridek, jamiyatimizning faol ishtirokchisiga aylanishiga, el-u yurtiga sidqidildan xizmat qilishiga, bir oilaning sevimli bekasi bo'lishiga astoydil ishonamiz.

Zamira TO'LAGANOVA

**AZIZA G'OLIB
CHIQDI**

2008-yil – «Yoshlar yili»



BOBOMIZGA EHTIROM

Bizning Qarshi shahridagi 34-maktabimizda ham Navoiyga bag'ishlangan «Barhayot Navoiy» nomli adabiy-badiiy kecha bo'lib o'tdi.

Maktabimiz direktori Mamlakat Qodirova kirish so'zi bilan ochib bergan kechamizni 9-«A» sinfining bilimdon va zukko o'quvchisi Sabina Mamadaliyeva olib bordi. Unda 6-«A» sinfining «Fano» hamda 6-«J» sinfining «Navo» guruhlari o'zaro bellashdilar. Buyuk shoir ijodidan namunalar o'qishdi, savol-javoblar bo'ldi. 6-«J» sinf o'quvchilari bilimdonlik bobida ustunliklarini isbotlashdi va kecha g'olibi bo'lishdi.

*Sh. ABDUNABIYEVA,
6-sinf o'quvchisi*

Bolam, sen bugun o'n ikki yoshni qarshi olding. Bolalikning beg'ubor damlari senga hamroh. Yorug'likka kelgan kuning ayni yoz pallasi edi. Go'yo quyoshni quchog'imizga tushgandek his etdik. Onang bilan qanchalar quvonganimizni bilsang edi. Boshimiz osmon-u falakka yetgan. Sen zehni o'tkir bola bo'lib chiqding. To'rt yoshingdan boshlab men aytgan she'rlarni bir zumda qoriyod qilarding. Qishloq to'ylarida davraboshi bo'lganimda, she'r aytishga oshiqib, katta davraga chiqqan jajjigina bolakayni she'rlaridan ko'plarining hayrati oshgan. Kelinlar senday bolalarni dunyoga keltirishni orzu qilib, pinhona seni quchib-quchib olganlariga guvoh bo'lganman...

Bugun o'n ikki yoshdasan. Bobomiz Bobur Mirzo sening yoshingda taxtda o'tirib, davlat ishlari bilan band bo'lgan. Sen-chi, nimalar bilan bandsan?.. Yaqinda qishloqqa borib, baholaring pasayib ketganini ko'rib achindim. Sababini so'rasam, ko'p narsalarni vaj qilding, qishloqda imkoniyatlar kamligidan noliding. Senga kompyuter olib berolmaganimni pesh qilding. Balki e'tirozlaring o'rindir. So'zlaring bolaligimni yodimga soldi. Biz bolalikda ta'tilni tog'lar quchog'ida o'tkazardik, o'shanda tunlari gulxanning atrofida o'tirib, dostonxonlik qilardik. O'n ikki nafar farzandni ulg'aytirgan onamiz rahmatlik bizlarni hech qachon butun bo'lib qolganimizni ko'rmagan bo'lsalar kerak. Birimiz harbiyda bo'lsak, yana birimiz shaharda, kenjatoyimiz albatta qirlar bag'rida mol boqib yurgan bo'lardi. O'shanda onam ko'kda charaqlab turgan to'lin oyga yolvorib, «Oy, bolamning boshidamisan?» degan iltijolarini ko'p bora eshitganman. Bugun oy mening boshimda charaqlab turibdi. Seni sog'inib, onamning so'zlarini oyga shivirlab aityapman: «Oy, bolamning boshidamisan?»

Ko'ngil hijroni meni shu ko'yga solganini bir kun albatta tushunib yetgaysan... Garchi Mashrab bobo devonalar yanglig' kuyib-yonib o'tgan bo'lsalar-da, biz ul zotni shoh Mashrab deya tilga olamiz. U ulug' zotning she'rlari asrlardan asrlarga o'tib kelyapti. Sening yoshingda bir bayt g'azali bilan Lutfiy hazratlarini lol qoldirgan ulug' Navoiy bobomiz qoldirgan buyuk meros besh yuz oltmish yetti yildir dunyo ahlini hayratda qoldirib kelayotgani sir emas. Yulduzlar bilan sirlashgan shoh va olim Mirzo Ulug'bekning rasadxonasida hisobsiz kitoblar bo'lganiga guvohmiz. Bugun kompyuterga yopishib olgan shaharlik tengdoshingni boshi otishma o'yindan chiqmay qolganiga achindim. Fikr-xayolini befoyd o'yinlarga sarf qilmayaptimikin?! Insonni ulug'likka ko'taradigan narsa bu – hayrat. Kishi Yaratganning mo'jizalaridan hayratlanib yashasa, albatta ko'p narsaga erishadi. Bobom rahmatlik bizlarni oynayi jahonga yaqin yo'latmas edilar: «Yosh bolaga nurning ziyoni bor, ko'zlaringni xira qiladi», derdilar. O'ylab ko'rsam, bobom haq ekanlar. Fikr teran bo'lishi uchun ko'proq kitob o'qish kerak. Kitobdan ko'nglingni uzmagin. Kitobda gap ko'p. Kitob kishining ko'nglini yorug', ko'zlarini ravshan qilgay.

Men senga, darslaringni o'zlashtirsang, velosiped olib beraman, degandim. Ertasi kuni darsdan beshta «besh» olib qaytding.

O'qigin, velosiped nima bo'libdi?! Sen dunyoni olishga qodir bo'li! Ulug' odamlarga havasim ortganidan ismingni Islom qo'ydim. Islom KARIMOV bo'lding. Yurtboshimizning jajji nabirasi. Albatta bu nomni ulug'laysan, deb o'ylayman. Prezident bobongni mamlakat obodonchiligi yo'lida olib borayotgan

ishlariga nazar sol. Hisobi yo'q... U kishi 2008-yilni «Yoshlar yili» deb e'lon qildilar. Bu sen uchun yana bir katta g'amxo'rlik emasmi? O'qigin, qishloqda ko'rgan kamchiliklaringni bartaraf etish yo'llarini o'zing izlab top!

Pandim senga yoqdimi? Omad yor bo'lsin! Sening baxtli bolaliging baxtiyor o'tishini Yaratgandan tilab qoluvchi, padari buzrukvoring!

Axtamqul KARIM

DAVRON ELINING JISMIDA JON BO'LG'IL



Toshkent-turizm kasb-hunar kollejida Alisher Navoiyning 567 yilligi hamda Zahiriddin Muhammad Bobur tavalludining 525 yilligiga atab o'tkazilgan tadbir ana shunday nomlandi. Ma'naviy-ma'rifiy kechaga taklif etilgan Yunusobod tuman ma'naviyat targ'ibot markazi rahbari Nigora Abdurahimova, «Tong yulduzi» gazetasi muxbirlari, olimlar, IIB xodimlari o'quvchilarga tanishtirilib, kecha ochiq deb e'lon qilindi.

Kollej direktori Xolmatjon Ahmedov o'z so'zlari orqali yoshlar tarbiyasida ma'naviy-ma'rifiy tadbirlarning o'rni beqiyos ekanligini ta'kidlab o'tdilar:

– Kollejimizda ko'plab tadbirlar o'tkazib turiladi. Bundan asosiy maqsad, yoshlarimizni barkamol inson, kelgusida jamiyatda yuksak mavqega ega bo'lib yuruvchi shaxslar sifatida ko'rgimiz keladi va bu yo'lda jamoamiz barcha kuch-g'ayratlarini ayamaydilar.

Ushbu maskanda yoshlarga katta e'tibor qaratilayotgani kollej ma'naviy-ma'rifiy ishlari bo'yicha direktorning birinchi o'rinbosari Bahodir Valiyev so'zlaridan ham o'z ifodasini topdi:

– «Yoshlar yili» munosabati bilan kollejimiz o'quvchilarining tafakkur dunyosini kengaytirish yuzasidan ko'plab tadbirlarni amalga oshirish rejalashtirilgan. Ayniqsa, o'quvchi yoshlar o'rtasida



turli xil jinoyatchiliklarni oldini olish, diniy aqidaparastlik, terrorizm, giyohvand moddalarning zararli oqibatlari yuzasidan soha mutaxassislari va adabiyot hamda san'at namoyandalari bilan uchrashuvlar, shular jumlasidandir.

Shundan so'ng, ulug' ajdodlarimiz Alisher Navoiy hamda Zahiriddin Muhammad Bobur hayoti va ijodi haqidagi fikrlarni, ular ijodidan namunalarni o'quvchilar diqqat bilan tingladilar. Savollarga javoblardan so'ng, kechada faol ishtirok etgan o'quvchilar Qahramon To'liqunov, Nargiza Asadova, Angelina Asamovalarga mehmonlar o'z sovg'alarini taqdim etdilar.

Gulyuz ORIFJONOVA


TADBIRDAN QUVONDIK



Shahrimizdagi xitoy tiliga ixtisoslashtirilgan 59-maktabda ulug' bobomiz Alisher Navoiy tavalludiga bag'ishlangan kecha bo'lib o'tdi. Kechada mahalla faollari ham qatnashdilar. Kechani ma'naviy-ma'rifiy ishlar bo'yicha direktor o'rinbosari Melixon Sharipova kirish so'zi bilan ochib berdi. Tadbirga tashrif buyurgan Islom universitetining islomshunoslik kafedrasi o'qituvchisi Doniyor Murodov Navoiy bobomiz haqida, Islom universitetini magistranti Jaloliddin Karimov ota-ona va farzand burchi to'g'risida fikr bildirdilar.


O'quvchilar Navoiy g'azallaridan namunalar o'qishdi. Tadbir barchaga quvonch baxsh etdi.

Muzaffar AHMEDOV



ATAULLOGA HADYA QILINGAN BOG'CHA-HOVLI

Ayni kunlarda she'riyat mulkingning sultoni, hazrat Alisher Navoiy tavalludi joylarda keng nishonlanmoqda. Buyuk bobokalonimizni xotirlash maqsadida, filologiya fanlari doktori, professor Hamidjon Homidiy bilan suhbatlashdik.



Hamidjon Homidiy taniqli sharqshunos, adabiyotshunos, olim va tarjimondir. Uning «Olis – yaqin yulduzlar», «Qirq besh alloma hikoyati» va «Mashq zamin – hikmat bo'stoni» kabi ko'plab kitoblari o'quvchilar tomonidan sevib o'qiladi. Domla Nizomiy nomidagi pedagogika universiteti talabalariga saboq berish bilan birga, Navoiy ijodini tadqiq va targ'ib qilish bilan ham jiddiy shug'ullanib kelmoqdalar. Ustozi rahbarligida «Navoiyga armug'on» ilmiy to'plami muntazam ravishda nashr etib boriladi.

– Shoir bobomizning bolalik yillari va yoshlarga munosabati haqida gapirib bersangiz.

– Alisher Navoiy bolaligidan zukko, zehni o'tkir, mehnatkash va ilmga chanqoq bola bo'lgan. Oila muhitida otasi G'iyosiddin Kichkinaning do'stlari tomonidan aytilgan har bir fikrni quyma-quloq qilib o'zlashtirib olardi. Ko'p she'r yod olar va har bir eshitgan baytini yodida saqlashga intilardi. Shuning uchun ham u to'rt yoshida mashhur faylasuf Fariddin Attorning

«Mantiq ut-tayr», «Qush tili» dostonini to'la yodlab olgan.

Navoiy maktab va madrasada bir umrlik do'sti Husayn Boyqaro bilan birga o'qidi. U maktabdosh va hamsaboqlarini e'zozlar, ustozlarini hurmat qilardi.

– Navoiy ko'plab yoshlarning homiysi va tarbiyachisi bo'lgan, deb o'qiganmiz, eshitganmiz. Shu haqda sizning fikringizni bilmoqchi edik.

– Haqiqatan ham Navoiy butun Hirot ilmiy, ijodiy, ma'rifiy muhitning homiysi, rahbari va yo'lbo'shchisi bo'lgan. U ko'plab masjid, madrasa, xonaqoh, tabobatxona, maktablar va qiroatxonalar qurdirish bilan birga, 40 dan ziyod olimlar, shoirlar, musavviru xattotlarning bevosita tarbiyachisi bo'lgan. Alohida iste'dod sohiblarini to'g'ri tarbiyalanishini nazorat qilib borgan. Kam ta'minlangan madrasa talabalariga vaqf mulki hisobidan maosh tayinlagan. Boshpanasizlarga uy-joy bergan. Uning homiyligida voyaga

yetgan adabiyotshunos, shoir Ataullo Mahmud Husayni shunday yozadi: «Nizomiya madrasasi yonida qarindoshurug'larimdan pul yig'ib, bir hujrani sotib olmoqchi bo'lgandim. Ittifoqo, buyuk amir devoni xizmatkorlaridan biri o'sha hujrani mendan ko'ra ko'proq pulga o'g'li uchun sotib olmoqchi bo'libdi. Men amirning xuzuriga bordim. Xizmatkorlardan izn so'rab, xona eshigini ochdim. Amir sohib Doro bilan nard o'ynayotgan ekanlar. Men kirishga ijozat so'radim. Bosh qimirlatib ijozat etdilar, ichkariga kirdim. Biroz dona surgach, Amir menga shunday murojaat etdilar: – Mavlononi qanday yumush huzurimga boshlab keldi?

Qo'l-oyoqlarim qaltirab, o'zimni yo'qotayozdim va birozdan so'ng, o'zimni qo'lga olib dedim:

– Men Nishopurlik yetim bola Atoyiman.

Nizomiya madrasasi yaqinidan qarindoshlar ko'magida bir hujra sotib olmoqchi edim. Devoningiz xizmatkorlaridan biri mendan ko'ra ko'proq pulga sotib olmoqchi. O'sha janobga aysangiz, hujrani menga qoldirsa...

Amir yana nard donalarini surish bilan band bo'ldilar. Birozdan so'ng, menga qaradilar-da, davom etdilar:

– Siz o'sha hujrani qo'lga kiritishingiz shartmi yo sizning muxlisingiz boshqa xona bersa ham bo'laveradimi? – Va qo'qqisdan sohib Doroga murojaat qildilar:

– Shu bugundan e'tiboran Nizomiya madrasasi yaqinidagi Devonga qarashli to'rt xonali bog'chalik hovli Ataullo Mahmud Husayni nomiga xatlab berilsin va oxirgi chegara miqdorida davlat hisobidan maosh tayinlansin!

Bu yigitcha keyinchalik Atoyi tahallusida she'r yozib, devon tuzgan. Navoiyga bag'ishlov «Badoye us-sanoye», «Nafis san'atlar» kitoblarni yozgan mashhur adibdir. Hazrat Navoiy atoqli shoir va yozuvchilardan Zayniddin Vosifiy, Osafi, Kotibiy va boshqalarning kamolotga yetishishida ham bevosita rahnamolik bilan ular ijodini kuzatib, taqdirlab kelgan.

Yosh avlodni komil inson etib tarbiyalashda, ijodiy faoliyatini to'g'ri yo'naltirishda Navoiy ko'plarga ibrat bo'lgan. Bobomizdagi bunday fazilatlar zamonamizning atoqli olimlari, ziyolilari tomonidan tashviq etilib, o'z faoliyatlari davomida tinimsiz izlanayotganliklari kishini mamnun etadi.

– Mazmunli suhbatingiz uchun rahmat, ustoz!

SHAHNOZA va AZIZA suhbatlashdi

O'QUVCHIGA QO'L TELEFONI KERAKMI?



– Dadajon, menga ham qo'l telefoni olib bering, – deb qoldi 6-sinfda o'qiydigan ukam tunov kuni. Dadam: – Hali juda kichkinasan, nima qilasan telefonni? – desalar:

– Sinfimizda hammada bor, birgina menda yo'q, – deya xarxasha qildi.

Maktabda o'qiyotganimda, a'lochi partadoshim Jasurga telefon olib berishgandi. Shundan keyin uning o'qishlari sezilarli darajada pasayib ketgani yodimda.

To'g'ri, qo'l telefonlari juda qulay aloqa vositasi-sanaladi. Insonning uzog'ini yaqin, mushkulini oson qiladi. Xat yozib o'tirmay, SMS xizmatidan foydalanish imkoniyatini aytmaymizmi?!

Lekin ulardan to'g'ri va o'z o'rnida foydalanyapmizmi? Ana shu jihatlari o'ylantiradi kishini.

Jamoat transportlarida ayrim tengdoshlarimning shovqin solib

telefonda gaplashishlari, undagi musiqalarni baland ovozda bir-birlariga ko'chirib berayotganlarini ko'rib, men uyalib ketaman. Ayniqsa, dars paytida bir-birlariga SMS xabarlarini yuborib, kulishib o'tirishlariga nima deysiz?! Nafaqat o'zlari, balki barcha sinfdoshlarining xayolini chalg'itishadi.

BIZNING TAKLIF:

Bir dugonamning aytishicha, u tahsil olayotgan litsey o'quvchilari binoga kirishlari bilan, darslarga xalaqit bermaslik uchun qo'l te-

lefonlarini o'chirib qo'yishar ekan. Menimcha, bunday tartib barcha ta'lim maskanlarida qo'llanilsa, maqsadga muvofiq bo'lardi.

Bir necha yillar avval sanoqligina insonlarda, asosan, tadbirkorlik bilan shug'ullanuvchilarda qo'l telefoni bo'lardi. Hozir esa hatto quyi sinf o'quvchilarining qo'lida ham uyali telefon ko'rsak, ajablanmay qo'ydik. Ayrim o'quvchilar, talabalarning

suhbat mavzusi darslar haqida emas, asosan, telefonlar haqida bo'layotgani ranjitadi kishini. Yaxshigina telefon apparatlarini falon pullik yangi markadagisiga almashtirib turishlariga nima deysiz?

To'g'ri, tezkor zamonada, texnika asrida yashayapmiz. Lekin har narsaning me'yori bo'lgani yaxshi-da.

Zilola MUTALOVA,

O'zMU qoshidagi litsey o'quvchisi

O'QITUVCHIGA-CHI?

Birinchii soat darsi edi. Ustozimiz darsga biroz kechikib kirdi. Endigina darsni boshlagan ham ediki, sinfdoshimiz Akmalning qo'l telefoni jiringlab qoldi. Darsga xalaqit bergani uchun ustozimiz Akmalni koyib, telefonini olib qo'ydi.

Darsning eng qizg'in pallasida ustozimizning qo'l telefoni jiringlab qoldi. Hammaning diqqati bo'lindi. Ustozimiz hozir telefonini o'chirib qo'ysa kerak, deb o'ylagandik. Unday bo'lmadi, ustoz telefonda bemalol gaplashaverdi. Sinfdagi g'ala-g'ovur boshlandi. «Bizning telefonimizni olishni biladilar. O'zlari esa bemalol gaplashaveradilar. Ularga mumkin-u, bizga mumkin emasmi?» degan e'tirozlar ham eshitildi.


BIZNING TAKLIF:

O'qituvchilar har jihatdan o'quvchilarga o'rnatilgan bo'lishlari kerak. Ular ham darsga kirishdan avval qo'l telefonlarini o'chirib qo'yishsa, maqsadga muvofiq bo'lardi.

TAHRIRIYATDAN:

Ziyarak gazetxon, payqagandirsiz, «Bizning taklif» nomli yangi rukn tashkil qildik. Unda qarama-qarshi fikr va mulohazalarni e'tiboringizga havola qilyapmiz. Muammolar haqida ko'p yozamiz-u, uni bartaraf qilish haqida ko'pincha o'ylab ham o'tirmaymiz.

Tengdoshlaringiz bildirgan fikr-mulohazalar xususida Sizning fikringiz qanday? Ustozlarimiz fikrlari ham biz uchun juda qadrli. Demak, maktublaringizni kutamiz!



Germaniya va Angliyadagi maktablarda dars paytida telefoni jiringlab qolgan o'quvchining otasiga jarima solinar ekan.

«AFANDI»NING O'G'LI

Zarur yumush bilan Namangan viloyatida chop etiladigan «Bolalar dunyosi» gazetasi tahririyatiga kirib o'tishga to'g'ri keldi. Tepasiga «Muharrir» deb yozilgan choqqina bir xona eshigini ochar ekanman, to'rda o'tirgan, to'ladan kelgan, o'rta bo'yli, sariqshingil bir kishi joyidan chaqqonlik bilan turdi-da, bizga peshvoz chiqdi.

Qarang, bugun biz bilan shirin muloqotda bo'layotgan kishi muhtaram ustozimiz Adham akaning sevimli farzandlari ekan. Po'latjonning aytganlaridan yana shu ma'lum bo'ldiki, tug'ilganlarida ham samimiy kulgu va yumorga yo'rgaklangan ekanlar.

O'shanda Adham aka oilasi bilan Samarqandda yashar, Sadridin Ayniyni kotibi bo'lib ishlar ekanlar. Adham aka o'g'il ko'rganlarini ishxonada eshitib, ustozlaridan shifoxonaga borib kelishga mashina so'rabdilar. Ayniy domla uni tabriklab: «Tug'ilgan vaqtini qara-ya, bu yerda ish to'lib yotibdi-ku», deya mashinasini beribdi va qo'shib qo'yibdilar: «Bolaning ismini Shoshqaloq deb qo'y, qolaversa, mashinaga benzinni o'zing quy». Adham aka ustozga qulluq qilib, shifoxonaga jo'nabdi. Ammo shoshilganda, yo'lda falokat yuz berib, mashinaning oldini pachoq qilib qo'ygan ekanlar. Shu-shu, Ayniy Po'latjonni ko'rganda, Adham akaga: «Mashinamning pachoq bo'lishiga sabab bo'lgan o'g'ling shumi?» deya hazillashar ekan.

Ot o'rmini toy bosar, deganlaridek, bugun Po'lat Hamdam ustoz Adham akaning munosib izdoshi. «Bolalar dunyosi»ga muharrirlik qilish bilan birga, «Narodnoye slovo» respublika gazetasining Farg'ona vodiysi bo'yicha maxsus muxbiridir. U o'zining hozirjavob, dolzarb mavzulardagi hayotiy maqolalari bilan minglab mushtariylarning qalbidan o'rin olib kelmoqda.

Oxunjon HAKIMOV,
O'zbekiston xalq shoiri

YASAMA TISH

– O'g'lim, qaragin-a, shanba kunidan beri dadangni kulgidan og'zi yopilmaydigan bo'lib qoldi, – dedi onasi.

– Bilasizmi, onajon, dadamlar shanba kuni yasama tish qo'ydirib keldilar-u, shu ko'yga tushdilar. Endi uxlab qolsalar ham kulib turganday og'izlari yopilmaydi.

MUSHUK

Sichqondan so'rashibdi:
– Dunyoda eng haybatli hayvon qaysi?
Sichqon shosha-pisha:
– Mushuk, – deb javob beribdi.

SOAT NECHA, DIREKTOR?

Tong saharda «Orom»

kinoteatrining direktoriga birov qo'ng'iroq qildi:

– Sizning kinoteatriningiz soat nechada ochiladi o'zi?

– Xodimlarimiz soat o'n birlarda kelishadi, – dedi direktor hayronnamo.

Oradan o'n daqiqalar o'tmay, haligi notanish kishi bo'g'iq ovozda yana o'sha savol bilan murojaat etdi:

– Sizning arzanda kinoteatriningiz qachon ochiladi, axir?


– Soat o'n birda, dedim-ku, – direktorning fig'oni ko'kka chiqdi. –

Bunchalik toqatsiz tomoshabin bo'lmasangiz?

– Tomoshani boshimga uramanmi, kecha ko'rgandim-ku. Men eshiklari berk kinozaldan chiqolmasdan xunobman...

Po'lat HAMDAM

J.K.ROLLING



Davomi. Boshi o'tgan sonlarda.

– Shodlanavering, chunki Siz-Bilasiz-Kim axiyri yo'q bo'ldi! Hatto siz kabi magllar ham bu eng baxtiyor kunda bayram qilishlari zarur!

Shu so'zlarni aytib, chol ikkala qo'llari bilan janob Durslning mahkam quchgancha, qo'lini qattiq siqib qo'ydi-yu ketdi.

Janob Dursl tom ma'noda yerga qapishib qoldi. Qarang-a, uni butunlay notanish kimsa quchoqladi-ya! Buning ustiga-ustak, uni qandaydir magl deb atashganlarini-chi... Bu so'z nimani bildirishiga qaramay, janob Dursl hayratda qolgandi. Axiyri joyidan jila olishni uddalaganidan keyingina bugun ro'y bergan voqealar-uning xayollari mevasidan ortiq hech narsa emasligiga umidvor bo'lgancha mashinasi tomon ildam odimlab ketdi. Garchi janob Dursl o'z xayolparastligi va uning mevalariga nisbatan ancha yomon munosabatda bo'lar edi.

U Tis ko'chasidan to'rtinchi uy tomon boradigan yo'lakka burilgan chog'ida, o'ziga tanish yo'l-yo'l baroq mushukni darhol payqadi. Uning kayfiyati butkul tushib ketdi. Janob Dursl bu xuddi o'sha mushukligiga aslo shubha qilmasdi, bu baroq o'sha rangda hamda ko'zlarining atrofida aynan o'sha g'alati dog'lari bor edi. Endi mushuk uning uyini qo'shnisikidan ajratib turuvchi devor ustida o'tirardi.

– Pisht! – baland ovozda dedi janob Dursl.

Biroq, mushuk qilt etmadi. Buning ustiga, mushuk janob Durslga shunday o'qrayib qaradiki, u hatto: «Ehtimol, mushuklar o'zlarini har doim shunday tutarlar?» deb o'yladi ham.

Keyin u o'zini qo'lga olib, xotiniga bu to'g'rida zinhor-bazinhor hech nima gapirmasligi kerakligini o'ziga uqtirgancha uyiga kirdi.

Dursl xonim uchun bugungi kun har doimgiday, juda ko'ngilli o'tgandi. Kechki ovqatlanish chog'ida u eriga qo'shnilarining qiziga oid jiddiy muammolari borligi haqida gapirib berdi va oxirida Dadli «Xohlayman!» degan yangi so'zni o'rganganini ma'lum qildi. Janob Dursl o'zini odatdagiday tutishga bor kuchi bilan harakat qilardi.

Dursl xonim Dadlini karavotiga yotqizganidan so'ng, janob Dursl uni o'pib, xayrli tun tiladi va mehmonxonadagi oynayi jahonni yoqish

uchun ketdi. Kanallardan birida kechki yangiliklar tugayotgan edi.

– Ko'rsatuvimiz nihoyasida butun Angliya bo'ylab ukkilarning g'alati ahvoldaligiga to'xtalamiz. Garchi ukkilar odatda tunda ovga chiqib, kunduzlari umuman ko'rinmasalar-da, bugun erta tongdan boshlaboq mamlakatimizning turli burchaklarida betartib uchib yurgan ukkilarni ko'rgan yuzlab odamlardan xabarlar oldik. Mutaxassislar ukkilarning nima sababdan o'z kun tartiblarini o'zgartirganliklarini tushuntirib berolmayaptilar, – shu yerda diktor miyig'ida kulib qo'yishga haddi sig'di. – Juda sirli. Endi esa so'zni ob-havo haqida ma'lumot berish uchun Jim Mak Gaffinga beraman. Nima deb o'ylaysan, Jim, bugun kechqurun yangi ukkilar yomg'irlari bo'lmasmikin?

– Bilmayman, Ted, – ekranda meteorolog paydo bo'ldi. – Lekin bugun nafaqat ukkil o'zlarini g'ayri oddiy tutdilar. Tomoshabinlarimiz Angliyaning Kent, Yorkshir va Dandi kabi chekka burchaklaridan menga qo'ng'iroq qilishib, kecha kechqurun va'da qilingan yomg'ir o'miga ularda haqiqiy yulduzlar yomg'iri bo'lganini ma'lum etishdi! Ehtimol, kimlardir yaqinlashayotgan bayramlarga atab mushakbozliklar uyushtirgan bo'lsa kerak. Garchi bayramga hali bir hafta muhlat bor bo'lsa ham. Ob-havo ma'lumotiga kelsak, bugun kechqurun yomg'ir yog'ishi kutiladi...

Janob Dursl orom kursida o'tirgancha jim qotgandi. Yulduzlar to'kilishi, kuppa-kunduzi uchgan ukkilar, rido libosidagi g'alati kishilar... Yana o'sha Potterlar to'g'risida tushunarsiz shivir-shivirlar...

Dursl xonim mehmonxonaga ikki piyola choy bilan kirdi. Va janob Dursl xotiniga hech nima aytmaslik haqidagi ahdi erib ketayotganini sezdi. U hech bo'lmaganda, nimanidir aytib berishiga to'g'ri kelishini angladi. Va asabiylashib yo'taldi.

– E... Petunya, azizim... Singlingdan anchadan beri xabar olmaganmiding?

U xuddi o'zi kutganiday, Dursl xonim chehrasida avvaliga ajablanish alomati ko'rindi, keyin g'azab paydo bo'ldi. Har holda, odatda, ular o'zlarini go'yo uning hech qanday singlisi yo'qdek ko'rsatardilar. Shu bois, janob Durslning savoliga nisbatan o'zini bunday tutishini tushunib bo'lardi.



Davomi bor.

Axir shaxmat bilan muntazam shug'ullanish, uning sir-sinoatlarini chuqur o'rganish insonning aqlini teranlashtirib charxlaydi-da...

Kechagina poytaxtimizda shaxmat bo'yicha o'n olti yoshgacha bo'lgan o'g'il-qizlar o'rtasida O'zbekiston birinchiligi o'z g'oliblarini aniqladi.

Ushbu musobaqada ishtirokchilar soni ko'p bo'ldi. 10 yoshlilar o'rtasida 48 nafar o'g'il bolalar, 13 nafar qizlar, 16 yoshgacha bo'lganlar orasida esa 55 nafar o'g'il bola va 25 nafar qizlar o'zaro bahs maydoniga ko'tarilishdi.

16 yoshli qizlar o'rtasida surxondaryolik Rayhona Doniyorova 7,5 ochko to'plab, musobaqa g'olibi bo'ldi. Rayhona o'tgan yili 2-o'rin bilan sohibasi bo'lgandi. Izlanishlar samarasi bu yil unga 1-o'rinni hadya etdi.

Qishki mavsum musobaqasining e'tiborli tomoni shunda ediki, bu musobaqada 6-7 yoshli bolajonlarimiz ham aka-opalari bilan bir qatorida tengma-teng bellashdilar.

Farg'onalik Nodira Parpiyeva 9 imkoniyatdan 6,5 ochko to'plab, musobaqada 3-o'rinni egalladi. O'n olti yoshlilar o'rtasida g'oliblikka erishgan bu qizaloqlar yutug'i hademay birinchilar qatoridan joy oladi.

Champion qizaloq bilan suhbatlashishga oshiqqan muxbirlar qatori biz ham jajji chempionning fikrlarini yozib olishga oshiqdik:

2-o'rin sohibi bo'lgan Toshkent viloyati vakilasi Maftuna Mamatqulovaning natijasi ham shaxmat muxlisi va murabbiylarini diqqatini tortdi. U o'tgan yilgi musobaqalar natijasiga ko'ra, kuchli o'nlikdan joy olgandi.

– Nodirabegim, necha yoshdan shaxmat o'ynaysiz?

– Besh yoshimda bu sehrli o'yinga qiziqib qolganman.

– Poytaxt musobaqasiga qanday tayyorgarlik ko'radingiz, axir kattalar bilan dona surish oson emas-ku?

– Menga shaxmat bo'yicha jahonning bir necha karra chempioni Garri Kasparov o'yinlarini dadam yaxshi o'rgatadilar. Musobaqalarga ham uning partiyalarini tahlil qilib tayyorlanaman.

G'OLIBANING G'OLIBLARI

Musobaqalarda yosh chempionlar kata va mashg'ulotining asosiy qismi hisoblanadi. kumite bahslarida mahorat cho'qqisini zabt etdilar. – **Jamoadoshlaringiz haqida ham bizga gapirib bersangiz?**

Karate bu sportning noyob va go'zal san'at turlaridan biridir. Unda shug'ullanayotgan har bir sportchi bola mashqlarida chaqqonlik hukmron.

Shundandir, sportning bu turida buyuk muhabbat yashirin.

Qahraton qishda viloyatimizning har go'shasidan poytaxt sari oshiqqan sportchi o'g'il-qizlar maqsadi respublika musobaqasida birinchilikni egallash edi. Hayajonli kata va kumite tatamida birin-ketin g'oliblar safini to'ldiryapti. Bahslarda kumite bo'yicha O'zbekiston chempioni degan sharaflı nom sohibi bo'lgan kostonlik Bahodir Dehqonovni chempionlik bilan qutlaganimizda, u bizga mahorati haqida quyidagicha izoh berdi:

– Karate bilan 2003-yilda shug'ullana boshlagan edim. O'shanda ukam Begzod ikkimiz Koson shahrida ochilgan karate klubiga qatnardik. Bir-ikki mashqning o'zidayoq yakka kurash turining bu sinovi kishini mardlik va matonat sari boshlashiga amin bo'ldim. Birinchi murabbiyimiz Sunnat Bo'riyevning usullarini o'rgandim. 2006-yildan Koson tumani neft-gaz kolleji sport zalida murabbiy Jasur Egamberdiyevdan saboq ola boshladik.

Ayni kunda Qarshi shahridagi «Bek» karate klubida Oybek Obqulov bizga ustozlik qilmoqda. Kumiteda g'alaba qozonish qiyin. Chunki jamoadagi uch nafar karatechi raqibning hammasi bilan bellashishi talab qilinadi. Kata – rasmiy mashqlar bo'lib, unda himoya va hujumga xos barcha usullar jamlangan. Shuning uchun ham kata karate

Bolalar, hech kuzatganmisiz, kun sayin hayotning qaysidir sohasida intiluvchan, iste'dodli tengdoshlaringiz yuksak marallarni ko'zlayotganini? Ayniqsa, sportchi bolalarning maqsadida bu tuyg'u muhabbatga aylangan.

Kechagina Jar sport majmui an'anaviy 8-O'zbekiston birinchisi musobaqalariga mezbonlik qildi. Bolalar va o'smirlar o'rtasida tashkillashtirilgan bu musobaqada yurtimizning 800 nafar yosh sportchilari ishtirok etdi.

Tarkibimiz Yusuf Pirimqulov, Dilshod Qilichev va Dilshod Hasanovdan iborat. Musobaqaning saralash bosqichlaridan so'ng, yarim finalda Toshkent shahri, finalda Samarqand viloyati jamoasi ustidan g'alaba qozondik.

– Bahodir, bugungi yutuqlaringizni ko'rib, xursandmiz. Bizni sportdagi orzularingiz qiziqirmoqda...

– Respublika musobaqasida ilk marta birinchilikni egalladim. Mening orzuim shu edi.

Endi kattalar o'rtasidagi musobaqalarda ham o'zimni sinab ko'rmoqchiman. Mashqlarga zo'r berib, xalqaro maydonlar sari yo'l olishni niyat qilganman. Yana bir niyatim – huquqshunos bo'lish.



GULRUHNI KASHF ETGAN KUN

Sportning mashaqqatlari-yu g'alabalari, mag'lubiyati va sinovlariga allaqachon ko'nikib ketgan 7 yoshli Gulruh opalari singari sport yo'lini tanladi. Shaxmat bo'yicha bir necha karra O'zbekiston chempionlari, mamlakat terma jamoa a'zolari farg'onalik opasingil Nafisa Mo'minova va Hulkar Tohirjonova erishgan yutuqlari bilan yurtimizda shaxmatchi malikalar nomiga munosib. Bugun ularning singlisi chempionlik nomiga va shaxmat donalariga mahliyo bo'lgan Gulruh Tohirjonova musobaqalarda qatnashmoqda.

O'zbekiston birinchiligida 10 yoshgacha bo'lgan shaxmatchilar o'rtasida birinchi bo'lgan Gulruhga ushbu musobaqa 9 imkoniyatdan 7 ochko jamg'arib, sovrindorlikni nasib ayladi.

Gulruh ham muxbirlarning savollariga javob beradigan bo'ldi.

– Oilamizda shaxmatga qiziquvchilar ko'p. Men shaxmat o'ynashni opamlardan o'rganib olganman.

– Bugungi musobaqada g'oliblar qatoridan joy oldingiz...

– Musobaqa meni Gulruh Tohirjonova deya kashf etdi. Yana ko'p musobaqalarda qatnashgim kelyapti. Opalarim yanglig' asosiy tarkib a'zosi bo'lsam, deymen.

Musobaqalardan qaytar ekanman, bilimli, yosh, barkamol avlodning dadilligini ko'rib quvondim.

Albatta, musobaqalarda qatnashishdan maqsadimiz Gulruh, Nodira, Zarina kabi jajji sportchilarni elga tanitishdir. El ichida vatanning dong'ini taratish bir-ikki kishining ishi emasligi bot-bot tilga olinadi.

To'g'ri-da, har qanday muvaffaqiyatning ildizida mehnat, mehr-muhabbatning olovi bor bo'lsa, yurtimizda chempionlarga tenglashayotgan avlod yurt sha'nini albatta ko'klarga ko'targay...



OLTIN MEDAL OLGAN ZARINA

Zarina BAXTIYOROVA 7 yoshda. Musobaqaning jajji ishtirokchisi Uzun tumanidagi 2-maktabning 2-sinfida o'qiydi.

Zarina ham musobaqaning g'oliblaridan biri. Bugun g'oliblik sururi Zarinaning hayajonlarini orzular mamlakatiga boshlagandek...

– Men 2 yildan beri tumanimizdagi «Champion» klubida tahsil olaman. Ustozim Ilhom aka Shoynezarov. Bugungi musobaqada yakka kata mashqlarida qatnashdim va oltin medalli bo'ldim. Klubimiz a'zolaridan aka-uka Shohruh va Himoyiddin Shukurovlar musobaqada uchinchi o'rindan joy olishdi. Yutuqlarimizdan murabbiyimiz ham, biz ham xursandmiz.

Surattak

Suratda:
«Marvarid» guruhi

Nazokatxon TOJIBOYEVA
tayyorladi

Adadi - 58114
Buyurtma N: J 4745

Tuzuvchi: Foziljon ORIPOV